

OFFERYNNAU STATUDOL CYMRU

**2010 No. 1821**

**Gorchymyn Sancsiynau Sifil Amgylcheddol (Cymru) 2010**

**RHAN 4**

**Gweinyddu**

**Tynnu hysbysiad yn ôl neu ei ddiwygio**

9. Mewn ysgrifen ar unrhyw adeg caiff rheoleiddiwr wneud y canlynol—
- tynnu hysbysiad cosb ariannol benodedig yn ôl;
  - tynnu hysbysiad cosb ariannol newidiol, hysbysiad cosb diffyg cydymffurfio neu hysbysiad adennill cost gorfodi yn ôl neu ostwng y swm a bennir yn yr hysbysiad;
  - tynnu hysbysiad cydymffurfio, hysbysiad adfer neu hysbysiad stop yn ôl neu ddiwygio'r camau a bennir yn yr hysbysiad er mwyn lleihau faint o waith sy'n angenrheidiol i gydymffurfio â'r hysbysiad.

**Apelau**

- 10.—(1) I Dribiwnlys yr Haen Gyntaf y gwneir apêl o dan y Gorchymyn hwn.
- (2) Mewn unrhyw apêl (ac eithrio mewn perthynas â hysbysiad stop) lle mae cyflawni tramgwydd yn fater y mae angen penderfynu arno, rhaid i'r rheoleiddiwr brofi'r tramgwydd hwnnw yn ôl yr un baich prawf a'r un safon prawf ag mewn erlyniad troseddol.
- (3) Mewn unrhyw achos arall rhaid i'r tribiwnlys bennu safon y prawf.
- (4) Mae pob hysbysiad (heblaw hysbysiadau stop) yn cael eu hatal nes i'r apêl gael ei chynnal.
- (5) Caiff y Tribiwnlys atal neu amrywio hysbysiad stop.
- (6) Caiff y Tribiwnlys, mewn perthynas â gosod gofyniad neu gyflwyno hysbysiad—
- tynnu'r gofyniad neu'r hysbysiad yn ôl;
  - cadarnhau'r gofyniad neu'r hysbysiad;
  - amrywio'r gofyniad neu'r hysbysiad;
  - cymryd unrhyw gamau y gallai'r rheoleiddiwr eu cymryd mewn perthynas â'r weithred neu'r anwaith sy'n arwain at y gofyniad neu'r hysbysiad;
  - cyfeirio'r penderfyniad a ddylid cadarnhau'r gofyniad neu'r hysbysiad, neu unrhyw fater arall ynglŷn â'r penderfyniad hwnnw, yn ôl at y rheoleiddiwr.

**Canllawiau ynghylch defnyddio sancsiynau sifil**

- 11.—(1) Pan roddir pŵer i reoleiddiwr yn y Gorchymyn hwn i osod sancsiwn sifil mewn perthynas â thramgwydd—
- rhaid i'r rheoleiddiwr gyhoeddi canllawiau ynghylch sut y mae'n defnyddio'r sancsiwn;

- (b) yn achos canllawiau ynglŷn â chosb ariannol benodedig, cosb ariannol newidiol, hysbysiad cydymffurfio, hysbysiad adfer neu hysbysiad stop, rhaid i'r canllawiau gynnwys yr wybodaeth berthnasol;
  - (c) rhaid i'r rheoleiddiwr ddiwygio'r canllawiau lle bo'n briodol;
  - (ch) rhaid i'r rheoleiddiwr roi sylw i'r canllawiau neu'r canllawiau diwygiedig wrth arfer ei swyddogaethau.
- (2) Yn achos canllawiau ynglŷn â chosb ariannol benodedig, gwybodaeth am y canlynol yw'r wybodaeth berthnasol y cyfeirir ati ym mharagraff (1)(b)—
- (a) yr amgylchiadau y mae'r gosb yn debyg o gael ei gosod odanynt;
  - (b) yr amgylchiadau na chaniateir ei gosod odanynt;
  - (c) swm y gosb;
  - (ch) sut y gall y rhwymedigaeth am y gosb gael ei chyflawni ac effaith ei chyflawni; a
  - (d) hawliau i gyflwyno sylwadau a gwrthwynebiadau a hawliau i apelio.
- (3) Yn achos canllawiau ynglŷn â chosb ariannol newidiol, hysbysiad cydymffurfio neu hysbysiad adfer, gwybodaeth am y canlynol yw'r wybodaeth berthnasol y cyfeirir ati ym mharagraff (1)(b)—
- (a) yr amgylchiadau y mae'r gofyniad yn debyg o gael ei osod odanynt;
  - (b) yr amgylchiadau na chaniateir ei osod odanynt;
  - (c) yn achos cosb ariannol newidiol, y materion sy'n debyg o gael eu cymryd i ystyriaeth gan y rheoleiddiwr wrth benderfynu ar swm y gosb (gan gynnwys adroddiad gwirfoddol gan unrhyw berson am ei ddiffyg cydymffurfio ei hun); ac
  - (ch) hawliau i gyflwyno sylwadau a gwrthwynebiadau a hawliau i apelio.
- (4) Yn achos canllawiau ynglŷn â hysbysiad stop, gwybodaeth am y canlynol yw'r wybodaeth berthnasol y cyfeirir ati ym mharagraff (1)(b)—
- (a) yr amgylchiadau y mae'r rheoleiddiwr yn debyg o gyflwyno'r hysbysiad odanynt;
  - (b) yr amgylchiadau na chaniateir ei gyflwyno odanynt; ac
  - (c) hawliau i apelio.

### Canllawiau ychwanegol

**12.** Rhaid i'r rheoleiddiwr ddyroddi canllawiau sy'n ymwneud â defnyddio cosbau diffyg cydymffurfio a hysbysiadau adennill cost gorfodi sy'n pennu—

- (a) yr amgylchiadau y maent yn debyg o gael eu gosod odanynt;
- (b) yr amgylchiadau na chaniateir eu gosod odanynt;
- (c) materion sydd i'w cymryd i ystyriaeth wrth bennu'r swm sydd o dan sylw;
- (ch) hawliau i apelio.

### Ymgynghori ynghylch canllawiau

**13.** Rhaid i'r rheoleiddiwr ymgynghori ag unrhyw bersonau y mae'n barnu eu bod yn briodol cyn cyhoeddi unrhyw ganllawiau neu ganllawiau diwygiedig o dan y Gorchymyn hwn.

### Cyhoeddi camau gorfodi

**14.—(1)** Pan roddir pŵer i reoleiddiwr i osod sancsiwn sifil o dan y Gorchymyn hwn mewn perthynas â thramgwydd, rhaid i'r rheoleiddiwr gyhoeddi o dro i dro adroddiadau sy'n pennu—

- (a) yr achosion y mae'r sancsiwn sifil wedi'i osod ynddynt;
  - (b) os cosb ariannol benodedig yw'r sancsiwn sifil, yr achosion lle mae'r rhwymedigaeth i'r gosb wedi'i chyflawni drwy dalu'r gosb ar ôl yr hysbysiad o fwriad a heb i ragor o gamau gael eu cymryd;
  - (c) os cosb ariannol newidiol, hysbysiad adfer neu hysbysiad cydymffurfio yw'r sancsiwn sifil, yr achosion lle mae ymrwymiad trydydd parti wedi'i dderbyn;
  - (ch) achosion lle mae ymrwymiad gorfodi wedi'i wneud.
- (2) Ym mharagraff (1)(a) nid yw'r cyfeiriad at achosion y mae sancsiwn sifil wedi'i osod ynddynt yn cynnwys achosion lle mae'r sancsiwn wedi'i osod ond wedi'i ddileu mewn apêl.
- (3) Nid yw'r erthygl hon yn gymwys mewn achosion lle mae Gweinidogion Cymru o'r farn na fyddai'n briodol cyhoeddi.